



MINISTERIO
Asuntunan Económico, Comunicacion
y Desaroyo Sostenibel

STATEN VAN ARUBA	Gobierno di Aruba L.G. Smith Blvd. 76 Oranjestad, Aruba Tel. (297) 528 4900
Ingek: 23 MAR 2022	
Volgnr: IS/696/21-22	

[Handwritten signatures]

VIA E-MAIL: edgard.vrolijk@parlamento.aw

Na Presidente di Parlamento di Aruba
Sr. mr. E.G.A. Vrolijk
L.G. Smith Blvd. 72
Oranjestad
Alhier

Fecha: 23 maart 2022

Nos referencia: **BMEZCDO/ 168**

Referente: 33 pregunta di miembro di Parlamento Sr. M. Mansur (UV/21-22/100, d.d. 20 januari 2022)

Apreciabel Presidente di Parlamento di Aruba,

Pa medio di e carta aki mi ta contesta e 33 preguntanan cu Lider di Fraccion di Accion 21, parlamentario señor M. Mansur a dirigi na mi persona. Lamentablemente mi no a logra contesta e preguntanan promer, pa cual motibo mi ta disculpa mi mes. Mi ta di opinion cu e derecho di un parlamentario pa haci pregunta por escrito na un minister ta un derecho importante di un parlamentario y mi lo trata na contesta futuro preguntanan mas liher.

Pregunta 1:

Minister ta na altura cu ya caba ta existi un Global Charter of Ethics for Journalists conoci como e Bordeaux Declaration (Bijlage 1)?

Si, mi ta na altura di e existencia di e Bordeaux Declaration, cual ta encera un codigo di conducta internacional pa periodistanan. E aplicacion di e codigo aki na Aruba no ta regla ya cu no ta trata di un tratado cu ta valido pa Aruba y conseqwentemente cada periodista na Aruba por dicidi unilateralmente con e ta duna contenido na e codigo aki. Si un periodista no tene su mes na e codigo aki, tampoco tin sancion legal como consecuencia.

Pregunta 2:

Nos a tuma nota di un articulo cu a ser publica den un media local (Bijlage 2) dia 9 di januari 2022 pa periodista sra. Sharina Henriquez, Minister por a lesa contenido di e articulo aki?

Si, mi a tuma nota y a lesa e contenido di e articulo menciona.

Pregunta 3:

Den e articulo aki sra. Henriquez ta declara cu gobierno ta haciendo mal uso di fondonan publico pa ataca oponente, algo igual na censura y algo cu bo por spera bao dictadura. Minister por splica si Gobierno mes tin un code of conduct cu ta regula su media strategy?

A pesar cu e promer parti di e pregunta no ta un pregunta pero un declaración, e contenido di esaki lo wordo adresa den mi siguiente contestanan.

No ta existi un code of conduct cu ta regula 'media strategy' di Gobierno.

Pregunta 4:

Minister ta di acuerdo cu Gobierno su strategia di media mester ta limita na comunica maneho di Gobierno y NO pa ataca oponente(nan) ya cu ta di e fondonan publico e ta wordo financia?

Mi ta di acuerdo cu gobierno mester usa fondonan publico solamente pa comunica maneho di gobierno y no pa ataca oponente(nan) politico. Bisando esaki, mester wordo defini si den e contexto aki kiko ta wordo considera como ataca oponente politico. Mi ta kere cu un minister mester por adresa argumento di un opositor politico cu por ehempel no ta corecto na un forma 'zakelijk'. Den mi opinion, informa pueblo correctamente ta parti di e tarea di un minister.

Pregunta 5:

Minister por splica si Gobierno tin un strategia (di media) cu ta cubri henter e aparato Gubernamental of cada ministerio y departamento ta ariba su mes?

Segun articulo 1, inciso 2, parti 2, di e Landsverordening instelling ministeries 2022 ("LIM 2022") e maneho general di informacion di gobierno ("het algemene voorlichtingsbeleid") ta resorta bou di minister di Asuntonan General, Inovacion, Organizacion Gubernamental, Infraestructura y Ordenansa Teritorial. Banda di esaki cada minister ta determina con su strategia di media ta ora ta trata asuntonan cu segun LIM 2022 ta cai bou di su responsabilidad ministerial, y cu no ta cai bou di e maneho general di informacion di gobierno.

Pregunta 6:

Como Minister di Comunicacion, Sr. Wever tin un bista ariba e fondonan cu ta wordo gasta ariba media pa e diferente ministerionan?

E asunto aki constitucionalmente no ta regarda e minister encarga cu comunicacion. Cada minister tin den e begroting di su bureau fondo aloca pa media. Señor Mansur por wak esaki tambe den cada begroting bou di Post 4330 Voorlichting en Promotie.

Post 4330 Voorlichting en Promotie:

- Kosten promotie- en mediacampagnes, druk- en distributiekosten brochures, incidentele advertenties, programma-uitzending, public relations gerelateerde kosten, kosten marktonderzoek en planning e.d.
- Kosten m.b.t. uitzendingen Statenvergadering en toespraken ministers op t.v., radio, internet en sociale media.
- Deelname kosten promotionele activiteiten (zoals inschrijfgelden, de huur van audiovisueel apparatuur en de huur van ruimte voor deze evenementen).

- Kosten advertenties en publicaties, seminars/conferenties in het binnen en- buitenland, verlichting koopavonden, enz. ter bevordering van de handel en industrie.

Cada minister ta maneha su propio presupuesto y ta responsabilisa su gastonan di forma independiente y di acuerdo cu Comptabiliteitsverordening 1989. Den e begroting di minister di Asuntonan Economico, Comunicacion y Desaroyo Sostenibel tin pa e aña 2022 Afl. 200.000,- presupuesta riba post 4330 'Voorlichting en Promotie'. Pa un contesta riba e pregunta pa tur ministerio señor Mansur mester busca post 4330 den begroting di cada minister. Pa haya informacion riba e suma cu e minister a usa di e suma presupuesta pa media (e 'realisatie'), compara cu e begroting, señor Mansur mester acerca cada minister individualmente, of e minister encarga cu finanzas. E tarea y competencia constitucional di e minister encarga cu comunicacion no ta regarda esaki.

Mi por menciona cu den e periodo di 20 di september 2021 te cu 31 di december 2021 mi ministerio a gasta Afl. 7.645,- na publicacionnan den medionan di comunicacion, y den e periodo di 1 di januari 2022 te cu 14 di maart 2022 e suma aki tawata Afl. 465,89.

Pregunta 7:

Minister Wever ta na altura di cualkier comunicacion na e diferente ministerionan cu ta delinea guidelines con nan por gasta fondonan publico den media?

Mi no ta na altura di esaki. Manera menciona anteriormente, cada minister ta responsable pa su propio maneho di media.

Pregunta 8:

Minister Wever por splica si tin algun guidelines ta regula nos planta di television nacional? Por ehempel tin un maneho cu ta stipula cu mester duna oposicion mes hopi atencion y airtime cu coalicion?

Mester hasi distincion entre informacion di gobierno y esun di partidonan politiconan cu tin un of mas asiento den Parlamento di Aruba. E base legal pa airtime di partidonan politico cu tin un of mas asiento den Parlamento di Aruba ta e Televisieverordening (AB 1988 no. GT 68) y e Landsbesluit voorschriften televisie-uitzendingen politieke partijen (AB 1994 no. GT 7).

Articulo 11, inciso 2, di e Televisieverordening ta stipula lo siguiente:

De exploitant stelt aan organisaties van partij-politieke aard zendtijd ter beschikking volgens bij landsbesluit, houdende algemene maatregelen te stellen regelen.

Den e Landsbesluit voorschriften televisie-uitzendingen politieke partijen ta regla entre otro:

Articulo 1, inciso 1:

Als organisaties, bedoeld in artikel 11, tweede lid, van de Televisieverordening (AB 1988 no. GT 68), worden aangewezen die politieke partijen of groeperingen, die één of meer zetels bezitten in de Staten.

Articulo 2, inciso 1 y 2:

1. De zendtijd, bestemd voor de in de eerste lid van artikel 1 bedoelde politieke partijen of groeperingen, bedraagt niet meer dan 30 aaneensluitende minuten per week, met dien verstande dat per week slechts aan één politieke partij of groepering zendtijd

ter beschikking gesteld mag worden. De exploitant deelt de zendtijd zodanig in dat de bedoelde politieke partijen en groeperingen gelijkelijk worden behandeld.

2. De zendtijd gedurende de in het tweede lid van artikel 1 bedoelde periode bedraagt niet meer dan dertig aaneensluitende minuten per week per politieke partij of groepering, in te delen door de exploitant van de desbetreffende televisie-inrichting.

Gobierno ta coordina e transmision di informacion pa e 8 ministernan, instancianan gubernamental, Gabinete di Gobernador, Minister Plenipotenciario, entre otro.

Telearuba a informami cu Telearuba ta presente na tur conferencia di prensa di partidonan politico cu tin un of mas asiento den Parlamento. Durante reunionnan publico di Parlamento y ariba peticion di lidernan di fraccion y/of ariba peticion di Telearuba fraccionan ta wordo acerca pa duna reaccion ariba casonan cu ta ser trata den Parlamento of casonan di interes general.

Personalmente mi ta di opinion cu partidonan politico cu of sin representacion den Parlamento di Aruba mester haya suficiente airtime pa por trece nan puntonan dilanti ya cu informa comunidad ta un tarea importante di un parlamentario/politico. E cuadro legal na e momento aki no ta duna partidonan politico sin representacion den Parlamento un derecho riba airtime.

E accionnan di TeleAruba ta 100% den man di SETAR y e accionnan di SETAR ta 100% den man di gobierno y como minister encarga cu comunicacion mi ta eherce e aandeelhoudersrechten den SETAR den nomber di Pais Aruba. Mi por indica cu mi persona no a instrui TeleAruba di ningun forma, ya cu esaki ta contra e corporate governance structure di SETAR y TeleAruba. Aunke e Televisieverordening ta duna cierto prerogativo na e minister encarga cu comunicacion, esaki no ta bai asina leu cu por instrui TeleAruba con pa hiba e maneho di media. Artículo 10, inciso 1, di e Televisieverordening ta duna e minister encarga cu comunicacion e derecho pa duna airtime na un instancia apunta door di e minister aki pa haci declaracionnan di bienestar general. Mi no a haci uso di e prerogativo aki.

Pregunta 9:

Recientemente un entrevista cu mi a duna pa TeleAruba a wordo posted ariba Facebook den su totalidad pero ora di pase den TeleNoticia anochi ela wordo edita y e partinan mas critico di Prome Minister Sra. Wever-Croes a keda afor. Minister Wever ta kere cu esey ta un maneho aceptabel pa un television nacional? Minister ta kere cu esaki ta un maneho neutral y/o profesional?

Mi a acerca TeleAruba pa duna mi nan input riba e pregunta aki, cual mi ta cita aki bouw:

“Tur conferencia di prensa y entrevistanan ta wordo transmiti completo ariba pagina di Facebook di Telearuba. Pa edicion di noticia anochi, e contenido ta wordo comprimi den maximo 3 minuut. Esaki ta wordo haci ariba discrecion y experiencia di un editor di noticia. Telearuba ta distribui contenido entre 5 diferente editor y sin ningun influencia di Gobierno. Telearuba ta trata mas cu ta posibel di tin reaccion y contra-reaccion. Peticion special of kehonan lo por wordo trata directamente cu Director di Telearuba.”

Personalmente mi ta kere cu Telearuba mester trece noticia na un forma independiente y si un político ta critico over otro político (mandatario) esaki mester ta parti di e cobertura, teniendo na cuenta e tempo cu tin disponible.

Pregunta 10:

Minister Wever por splica kiko ta wordo haci pa sigura independencia di e planta nacional (di television)?

TeleAruba ta cumpli cu su tareanan sin ningun intervencion di gobierno. E corporate governance di SETAR y TeleAruba ta garantiza cu un minister no tin autoridad pa interveni den e maneho di TeleAruba y si un minister dicidi pa haci esei, e director di TeleAruba tin e autoridad pa referi e minister ey back na e corporate governance. E cuadro legal cu mi a describi den mi contesta riba pregunta 8 den mi opinion ta garantiza e independencia di TeleAruba y na mes momento ta duna e minister encarga cu comunicacion e autoridad pa actua si ta necesario bou di condicionnan stipula den e Televisieverordening.

Mi a pidi mi consehero jurídico analisa si ami como Minister di Comunicación basa riba e cuadro legal actual tin autoridad pa por ehempel establece regla den e cuadro aki, si tin necesidad pa establece regla den e cuadro aki y si tin necesidad, con esaki por wordo haci.

Pregunta 11:

Un otro problema cu nos a nota ta un desigualdad di acceso, TeleAruba ta haya acceso preferencial y esaki tambe por ser considera un tipo di censura. Ki Minister lo haci pa sigura cu tur media ta haya acceso igual?

Manera mi a menciona anteriormente cada minister ta responsable pa su propio maneho di media. Mi ministerio no ta haci distincion entre niun media.

Pregunta 12:

Ministerio di Comunicacion tin un maneho cu ta distigui entre informacion publico, entre otro comunica maneho di gobierno y informacion personal of politico cu no por ser haci cu fondonan publico?

Te na e fecha di e carta aki mi a haci anuncio paga den medionan di comunicacion tres biaha, tur tawata den cuadro di mi funcion como minister di Asuntonan Economico, Comunicacion y Desaroyo Sostenibel. Mi a percura pa e anuncionan aki a wordo publica den diferente media. E otro articulonnan no tawata rekeri pago pa nan a wordo publica y nan a wordo manda pa tur media. Mi por confirma cu na momento cu mi publica un anuncio personal of politico mi lo no financia esaki cu fondonan publico.

Pregunta 13:

Pakiko Ministerio di Comunicacion no ta haci uso di destaho publico pa comunica e maneho di Gobierno?

E reglanan di destaho publico ta aplicable riba tur gasto di gobierno, pues cada minister mester sigura cu e gastonan cu e ta haci pa cu su marketing cumpli cu Comptabiliteitsverordening 1989 y si esei no ta e caso e por wordo teni personalmente responsable segun articulonnan 25, 26 y 31 di e ley aki. Mi a tene mi mes completamente na e cuadro legal aplicable pa maneho di fondonan publico. Wak tambe mi contesta riba pregunta 6.

Pregunta 14:

Gobierno tin un codigo di conducta pa Ministernan distingui ora nan ta comunicando como un mandatario of lider/miembro di un partido politico?

Na momento cu ministernan ta comunica como lider of miembro di un partido politico y no como mandatario, nan (lo) mester menciona esey explicitamente.

Pregunta 15:

Minister ta di acuerdo cu ora un mandatario ta duna declaracion politico of personal no ta apropiada pa haci esey den un conferencia di prensa di Gobierno?

En principio mi por ta di acuerdo, pero e no ta cuestión preto y blanco y pues ta depende di e situacion. Pa duna un ehemplo: Por ta asina cu un minister ta haya un pregunta di un periodista durante un conferencia di prensa cu por ehempel ta referi na un expresion di otro politico y pa e minister por contesta e pregunta, e mester contra aresta e argumento cu e periodista a haci basa riba e expresionnan di e otro politico. Pues den e caso aki mi ta ilustra cu e libertad cu prensa tin pa haci pregunta politico, lo mester por duna e minister e libertad pa contesta esaki y defende su mes. E forma con e ta haci esaki ta importante.

Pregunta 16:

Minister ta considera cu conferencia di prensa den cual un mensahe politico ta wordo comunica, entre otro atake ariba opositornan ta kibra credibilidad di Gobierno?

Si e mensahe ta pa aclarea un informacion incorrecto cu oponente ta difundi, e minister ta den obligacion pa aclarea esey. Sino ta crea un imagen erroneo di e maneho di gobierno local mester wordo evita. Bisando esaki, mi ta di opinion cu un minister no mester usa e forum di un conferencia di prensa pa simplemente ataca un oponente politico.

Pregunta 17:

Ki pasonan Minister lo tuma pa sigura cu conferencianan di prensa di Gobierno sosode den un forma corecto?

Manera menciona anteriormente, cada minister ta responsable pa su propio maneho di media. Mi no ta na altura cu tin critica di ningun medio di comunicacion riba e conferencianan di prensa di mi ministerio, ni tampoco pa publicacion di articulonan den corant.

Pregunta 18:

Minister no ta kere cu lo ta mihor stimula mas prensa liber lugar di purba limita?

Tanto gobierno como mi persona ta para pa prensa liber. Mi semper ta habri pa papia cu tur medio di comunicacion semper y cuando tempo ta permitimi esei. Te cu awe nunca mi a sera porta pa medianan di comunicacion y semper mi ta den contacto cu tur medio di comunicacion cu ta acerca mi persona.

Pregunta 19:

Minister ta kere cu tin garantia suficiente den nos sistema hudicial pa atende cu p.e. menasa of difamacion?

Pa atende cu menasa of difamacion tin ley nan penal, pero esaki no ta cubri tur tipo di insulto, difamacion, etc. Un codigo di conducta cu ta aplicable pa media, y cu ta wordo estableci dor di media mes y cu ta cai bou responsabilidad di media, por juda cu otro expresionnan indesea cu no ta castigabel pa ley penal, wordo desapropa door di e media mes. Un codigo asina ta wordo maneha completamente independiente di gobierno y ta wordo forma dor di media mes. Finalmente media mes lo dicidi kiko ta aceptable y kiko no.

Pregunta 20:

Minister a considera di duna sosten na un asociacion di prensa local pa por ehempel establece acreditacion?

Mi a wordo informa cu minister-president ta tratando 4 aña caba pa logra esaki, pero cu prensa local no a logra asocia su mes ainda. Mi ta kere cu lo ta bon si prensa local por uni den un asociacion y cu esaki por wordo acredita. Como minister encarga cu comunicacion mi ta mas cu dispuesto pa duna un contribucion na esaki.

Pregunta 21:

Gobierno tin plan di inverti den educacion di periodismo?

En principio esaki no ta e responsabilidad di gobierno, ya cu ta trata un 'beroepsgroep' cu mester percura pa su propio educacion. Sinembargo mi ta kere si cu gobierno mester stimula educacion, formacion profesional, etc. y lo mester stimula, apoya of inicia un programa di educacion pa media, mescos cu lo bai haci pa otro beroepsgroepen. Den e cuadro aki por pensa riba seminario, conferencia of workshops, pero en general mester pensa den forma hopi cauteloso pa evita cu Gobierno ta ser acusa di kier controla prensa y/of hibe den un cierto direccióon pa medio di seminario etc.

Pregunta 22:

Minister ta segura cu tur ministerio ta invita tur prensa ora di duna conferencia di prensa?

Manera mi a indica anteriormente cada minister ta responsable pa su propio maneho di media. Mi por confirma y segura cu mi ta invita tur medio di comunicacion pa mi conferencianan di prensa y mi ta manda mi articulonan pa tur medio di prensa.

Pregunta 23:

Minister ta na altura cu ta existi maneho na algun companianan estatal y semi-estatal cu ta prohibi usa cierto media?

Companionan estatal ta fiha nan propio maneho di media, dependiendo di e mercado cu nan mester alcanza. Corporate governance no ta duna espacio pa gobierno intervini den esaki, locual tambe ta nifica cu gobierno no ta (supposed di) instrui companianan estatal pa (no)haci uso di cierto media.

Pregunta 24:

Minister ta na altura cu na Utilities N.V. tin un maneho sea oficial of no cu ta prohibi pone propaganda cu 24ora, e media mas usa na pais Aruba? Minister por a informa Parlamento si e prohibicion aki a wordo introduce bao di maneho di Gabinete Wever-Croes I of II?

Ami no ta na altura di e maneho aki y mi ta referi na mi contesta anterior y ta añaadi cu e pregunta aki lo mester ser haci na e minister encarga cu Utilities N.V.. Mi ta bolbe subraya cu companianan estatal tin e libertad pa hiba nan maneho di media.

Pregunta 25:

Kiko Minister lo haci pa mehora integridad di Gobierno su media policy y esnan di departamentonan y empresanan di Gobierno.

E tarea manera formula den e pregunta aki no ta cai bou di responsabilidad ministerial di e minister encarga cu comunicacion. Mi ta responsabel si pa mi bureau y tur departamento cu segun LIM 2022 ta resorta bou di mi ministerio. Mi ta hiba un maneho di media pa mi ministerio di forma integro den cual niun media ta wordo exclui.

Pregunta 26:

Minister ta kere cu tur mandatario mester ta disponibel pa papia cu tur media como sirbidornan di pueblo?

Si, personalmente mi ta haya esei.

Pregunta 27:

Minister tin un maneho pa garantisa acceso pa tur media na tur gobernante (Minister y Parlamentario)?

Manera mi a menciona anteriormente esaki no ta mi responsabilidad segun LIM 2022. Ami personalmente ta disponibel pa tur media y nan por contact mi semper via email, whatsapp of via e PR department di mi bureau.

Pregunta 28:

Minister por a specifica e suma total cu Gobierno, su departamentonan y companianan estatal y semi-estatal a gasta na media desde 2017-2021?

Señor Mansur por deduci e informacion financiero di gobierno y departamentonan gubernamental di begrotingspost 4330 'Voorlichting en Promotie' di e begroting di cada ministerio pa cada año. E informacion aki ta publico.

Mi a pidi e informacion aki di e companianan estatal y semi-estatal cu ta resorta bou di mi responsabilidad. Mi a puntra un hurista pa evalua si e informacion aki por wordo comparti cu Parlamento di Aruba segun e corporate governance y privacy laws. Si por comparti e informacion aki, mi lo suministra esaki manera mi haye. Pa locual ta trata e otro companianan estatal y semi-estatal mi ta referi señor Mansur na e ministernan bou di kende e companianan estatal y semi-estatal ta resorta.

Pregunta 29:

Minister por a specifica na cua empresanan e fondonan aki a wordo gasta incluyendo corant, website, radio y television? (incluyendo fe cua entidad y cuanto na cada media?)

Mi ta referi na mi contesta riba pregunta 6 y ta añadi cu e pregunta aki mi por contesta solamente pa mi ministerio, desde e momento cu mi a bira minister. E medianan cu a ricibi pago di mi ministerio ta Uitgeverij Amigoe N.V., the Media Group dba AWE Mainta, Headline Group N.V., dba Tera News, Caribbean Speed Printers N.V. dba Bon día, Diario N.V. Pa locual ta trata e otro ministerionan mi ta referi señor Mansur na e diferente ministernan.

Pregunta 30:

Minister por a splica con e medianan cu ta ribici e fondonan publico aki ta wordo escobi?

Manera mi a menciona anteriormente cada minister ta responsabel pa su propio mediabeleid. E biahanan cu mi ministerio a paga pa publica un of mas articulo den media, mi a scohe esaki basa riba e audiencia cu mi kier (a) alcanza.

Pregunta 31:

Minister ta kere ta importante pa hancra un maneho universal den sector publico pa uso di media, asina garantizando cu fondonan publico no ta wordo malusa?

Manera mi a menciona anteriormente cada minister ta responsable pa su propio mediabeleid. Mi ta kere si cu un minister tin un obligacion pa informa pueblo di su maneho y e mester dicidi cua media e ta haya mas apropia pa usa y cu tin valor agrega pa su campaña di comunicacion. Mi no ta kere cu e simple hecho cu un media ta existi (por ehempel un radio, corant, canal di television of website) ta duna e media aki e derecho pa haya publicidad di gobierno, of ta trece un obligacion pa un minister usa e media aki tambe, sino cu e media mester contribui na e campaña specifico di comunicacion di e minister.

Pregunta 32:

Minister ta kere ta importante pa compra den media wordo haci via destaho publico of segun nan respectivo audiencia?

Mi ta referi na mi contesta riba pregunta 13.


Pregunta 33:

Minister ta kere tin maluso di fondonan publico pa faborece medianan cu ta publica unicamente noticianan favorabel di Gobierno actualmente?

Mi no ta dispone di data na e momento aki pa por contesta e pregunta aki. Mi kier subraya si cu desde cu mi a bira minister ta 4 biaha so mi ministerio a paga pa publica un articulo of un 'ad' y cu tur articulo cu ta sali di mi ministerio ta bai pa tur medio di prensa y cu tur medio ta wordo invita pa conferencia di prensa. Mi ta ripiti cu tur periodista tin acceso directo na mi ministerio of na mi persona. Mi ministerio no ta paga niun medio di comunicacion pa publica articulo relaciona cu mi maneho y a haci esei ora tawata trata un situacion particular, por ehempel e anuncio di e promer 'geregistreerd partnerschap', homenahe na un ex-director di un departamento di gobierno y compania estatal, propaganda pa e christmas shopping nights cu mi ministerio a organisa y ora un persona a fayece a pone un anuncio di morto den corant.

Mi ta spera cu mi a contesta e preguntanan di miembro di Parlamento señor Mansur debidamente.

Atentamente,



mr. G.B. Wever

Minister di Asuntonan Economico, Comunicacion y Desaroyo Sostenibel.